

Bunas prestaziuns da Jon-Fadri e Cla-Ursin Nufer ell'Italia

Parallelmein cun cuorsas dil Cup Continental han giu liug la fin dall'jamna vargada a Sappada ell'Italia era las concurrenzas nordicas el rom dils Giugs dall'organisaziun dallas uniuns da skis dallas tiaras dallas Alps. Per quels giugs ei *Jon-Fadri Nufer* dil Club da skis Sedrun-Tujetsch vegnius selecziunus da Swiss Ski. Ella cuorsa singula da 7,5 km dil stil classic era il Tuatschin sin via ad in fetg bien resultat. El ei lu denton ruclaus e ha rut in fest. Quei mument era el aunc meglier Svizzer. Tonaton ha el terminau la cuorsa sco 19avel. La dumengia eis el separticipaus ord concurrenza alla staffetta cun in'equipa cun curriders da pliras naziuns.

Cla-Ursin Nufer, medemamein dil CS Sedrun-Tujetsch, ch'ei vegnius fiers anavos quest unviern damai ch'el ei staus ditg malsauns, ha mussau remarcablas prestaziuns ellas duas cuorsas dil Cup Continental. Ella cuorsa da 15 km dil stil classic la sonda eis el daventaus 40avel, en quella dil stil liber la dumengia, medemamein sur 15 km, ha el contonschiu il bien 20avel rang. En omisduas cuorsas ha el teniu petg als megliers, pér la fin dallas cuorsas ein ils deficits sin fundament dalla maldispostadad all'entschatta digl onn semussai. (fmr/hh)